

Zeitschrift: Schwyzerlüt : Zyschrif für üsi schwyzerische Mundarte

Band: 5 (1942-1943)

Heft: 6-8

Artikel: Fründe brichte vom Simon Gfeller : Erinnerige a Simon Gfeller vom Josef Reinhart

Autor: Reinhart, Josef

DOI: <https://doi.org/10.5169/seals-179494>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 08.08.2025


ETH-Bibliothek Zürich, E-Periodica, <https://www.e-periodica.ch>

Fründe brichte vom Simon Gfeller.

Erinnerige a Simon Gfeller

vom Josef Reinhart.

Es isch vor öppe dryßg Johre gsi; wenn ig's rächt will säge,
im Wymonet anno acht, also gly feufedryßg Johr; sälbtmol sy
üsere zwee Fründe vo s' Gotthälfis Grab ewägg dr Wald uf gchräs-



Simon Gfeller, der Lehrer uf der Egg
Us em Band „Lützelfüh“ von Emanuel Friedli („Bärndütsch“)

met, und uf em Hoger obe hei mer nit lang müeße sueche, wo
das Egg-Schuelhäusli steit. Mit der Zylete vo Pfeistere luegts über
die waldige Hübel us über d'Dörfer, ~~abe~~ s'Aemmetal dür uf, i
d'Bärgen yne.

„Do obe möcht mes au verlyde!“ hei mer gseit, wo nis die ryfen Oepfel und Bire vo de Bäume glustig gmacht hei. Do oben isch er also deheime, der Eggschuelmeister Simon Gfeller, wo der Pfarrer Friedli vonem brichtet i sym Bärndütschbuech vo Lützelflüeh; und das isch's au gsi, nit numme die schöni Ussicht, was üs do ufe zoge het: Ne Ma lehre bchönne — das het me scho



Frau Meta Gfeller-Gehrig, d'Lehrerin uf der Egg
Us em Band „Lützelflüh“ von Emanuel Friedli („Bärndütsch“)

chönne gwahre us der Zeichnig vom Münger Ruedi i däm Buech vom Friedli - ne Ma, wo mit syne heiteren Auge meh gseht vom Läben, as mänge mit em fynste Späktiv; ne Ma, wo dure dickst Chittel de Lüte no is Härz cha yneluege.

Item, mir hei nit lang bruche z'chlopfen am untere Schuel-huuspfeister. Dört hocket er im gäle Mutz am Pültli vor de läre Bänke. Jetz chunnt er, und mir froge, ob mer es Rüngli dörfe leue uf em Bänkli vor em Huus und öppen eini vo de gäle An-kebire chüste, wo im Chörbli näbedra eim s'Muul hei mache z'wässere. Derwylen aß är sy Pfyfen ygmacht het, so hei mer gseit, wär mer syge, und wo ner verrote het, aß er au scho öppis vonis g'hört heig töne, do ischs nit lang gange, so sy mer scho fasch deheime gsi uf der Egg.

Mir hei nis lang chönne veräxgüsiere, mir welle nit störe; was het er gseit? sy Armerächnig chönni warte, und de Imbe chönn er au nit hälfe d'Hunggwabe z'dechle. Guet, so sy mer blybe chläbe, fasch gar e ganze Nomittag. Wär hätt nit müeße lose, wo ner het afo uspacke, verzelle vo syne Buurelüte, vom Vorderhuusdrätti, vo de Rueihbettchünge, armmüetige Fraueli am Hogerrain, vo kurlige Chnächte, ungfehlige Jumpfere.

Me het nit gnue chönne lose, und mer hei üsi süeßen An-kebire bald vergässe. Me hets gseh vor den Auge: läbig und lyb-ähnlig, wenn er brichtet het, vo deheime im Dürgrabe hinde, vom Drätti, wo ner d'Vögel het lehre bchönne; vom Müeti, wo nem die erste Hösli gschnyderet het us s'Vaters alter Halblynchutte, vom Schuelwäg übere gfrornig Schnee uf de Faßdube is Dörfli abe. — Sälbmol, wo der Eggschuelmeister so verzellt het, hei mer gwahret, was s' brucht für ne guete Gschichteschryber: nes Paar gueti Auge, fyni Ohre, ne Chopf, wo d'Lüt und s'Läbe erfahrt, wie s' isch und chönnti sy, es Härz voll Freud und Liebi und au voll Glaube, aß der Herrgott d'Wält nit loht lo verlottere, bim Guetha nit und au im Ungfehl nit.

Der Shakespeare seit i eim vo syne Theaterstücke, me sell nit Duzis mache, bis me nes Päckli Tubak verraukt heig zsäme. Aber s' isch nit lang gange, sälb Nomittag no; wonis der Simon Gfeller s'Gleit gä het gäge Sumiswald abe, hei mer nander d'Hand drückt und Fründschaft gschlösse. „Du, los, i chönnti hinecht fasch nit schlofe, wenn der das nit seiti: Du bisch e Brichti, wie nit mänge uf s'Herrgotts Wäge lauft. Du muesch's ufschriebe; so saftig, wie vo der Zunge laufts der sicher us der Fädere!“ Er lächlet, blinzlet mit de heiteren Aeugline unter de dicke Braue vüre, zündet d'Pfyfen a, lüpft und mürpft und blost der Rauch näbenuse: „Der Friedli hets au scho gmeint! Mir hei zsäme d'Nase i mängs Gänterli ynegsteckt und d'Ohre gstrüßt, wie d'Lüt der Schnabel bruche. Aber näb e somene große Birebaum, wo der Gotthälf pflanzet het, chäm so nes Tschöderli nit uf!“ Mir hei glachet und hei gseit, au us eme Tschöderli wachst e Baum, wenns guete Bode het, und es bruche nit grad Bire zsy, es git no anderi Sorte, süeßi und au suuri.

S' Johr druf, wonig acht Tag im Schuflebüehlbädli amene
neue Theaterstückli bastlet ha, so sy mer am Füürobe wieder
zsäme uf em Bänkli vor em Eggschuelhüsli ghöcklet, und d'Frau
Gfeller het glächlet und het gseit, der Ma heig jetz e neue Has
ufjagt, me müeß en mängisch zweumol rüefe für zum Zimis-
ässe, er heig scho fasch es Druckli Schuelhuusfädere brucht ob
syner Gschrift. Der Simme het glächlet näbedra und syni Räuchli
blost und gseit: s'Egghuusmüeti tüei scho nes bitzli übertribe
mit däm Druckli Fädere, er heig ömmel dernäbe d'Imbe nit ver-
gässle und großi Chölichöpf hebs au im Garte, wonär heig ghulfse
setze, und bim Oepfelgünne uf der Leitere syg mängisch d'Fädere
i der Stube trochnet.

Sälb Obe no bim Lampeliecht het mir der Simon Gfeller us
de große Böge vom Spinnetli im Hinterhuus vorgläsc. Er het
mängisch müeße warte, bis ig der Schnuuf ha chönne finde, so
het mi s'Lache gschüttlet. Aber wo mer zu Samis letztem Stündli
cho sy, do hanig d'Auge chly müeße zuetue, aß er nit gwahret
het, wies tauet drunder.

Sälb Samstig, wonem d'Hand drückt ha und danket, hani
zuenem gseit: „Simon, us däm Tschöderli, wo gseit hesch färn,
isch jetz scho ne Banm ufgwachse, und a de Früchte, wo ner
treit, würde si viel Lüt chönne ernüefere!“

Es Johr druf isch bim Alexander Francke z'Bärn das erste
Buech usecho: Heimisbach. I has i de letzte Johre wieder neu
lo ybinde, worum? es het scho gar mänge vo myne Schuelere
d'Nase dry gsteckt gha und gseit, eso ne Schuelmeister, wie ner
i däm Buech inn stöih, möcht er au gärn würde.

Di neui Brattig für Schwyzerlüt 1944

chunt im September als **Bärnerbrattig** use.

80 bis 100 Site. Pris ca. Fr. 1.50 (vo 12 Ex. a gits
Rabatt). Vorbestellunge a: Schwyzerlüt-Verlag (Dr.
G. Schmid, Fryburg, IIa 795).

Usem Inhalt: Simon Gfeller als Mönsch und Dichter. (G.S.)
NB. Mir sueche no Inseratewärber, Widerverchäufer und Ablage
i den Ortschafte. Wer hilft üs e chli?